


TEZĂUR LITURGIC
8 MARTIE

ACATISTUL
SF. CUVIOS
LAZĂR
DE LA MUROM



MOSCOVA, 2000



Акафист Преподобному Лазарю Муромскому

Кондак 1

Возбранному воину Христову, преславному
угоднику Божию, духовного возрождения земли
Карельской, теплому ходатаю, тебе, всехвальне
Лазаре, житием богоугодным путь к
совершенству и любви нам указующему, пение
хвалебное приносим от благодарных сердец во
умилении зовуще: Радуйся, преподобне Лазаре,
терпения наставниче и теплый о нас
молитвенниче.

Икос 1

Ангельский лик с человецы воспеваает купно:
“Ликуй, Фиваидо Русская, красуйтесь пустыни и
дебри Олонецкия ... возрастившия святое и
славное отец множество ... “.Русская северная
природа, чистая и свежая, водою напоенная,
печали и тайн богатая, души врачующая, влече
к себе. И ты, достоблаженне Лазаре, грек, инок
Константинопольския обители Высокогорския,
на север притекл еси по глаголу пророческу:
“желания сердца его дал еси ему предварил
еси его благословением благостынным”. Зде на

севере и плоды, достойны вечных житниц,
принесл еси. Сему радуясь, воспеваем ти:
Радуйся, Лазаре, в благословенном Царьграде
рожденный;

Радуйся, епископом Кессарийским в боголюбии
воспитанный.

Радуйся, послушание епископское идти в
великий Новград получивый;

Радуйся, блаженное послушание то радостно
исполнивший.

Радуйся, Лазаре, вершинам иночества
приходящих к тебе научивый;

Радуйся, отче богомудрый, ум свой от всякаго
пристрастия свободивый.

Радуйся, святе, очи сердца своего непрестанно к
Богу устремлявший;

Радуйся, в мире надмирно поживший, и нас к
тому просветивый.

Радуйся, преподобне Лазаре, терпения
наставниче и теплый о нас молитвенниче.

Кондак 2

Видя Господа пред собою выну и, веруя Ему
всем сердцем своим, иго Христово на выю свою
приял, преподобне отче Лазаре, путем “тесных
врат” шествовал еси, мечем слова Божия волю
свою отсекая, делами веру являл и непрестанно
Богу Всещедрому вопиял еси: Аллилуа.

Икос 2

Разум Божественных и отеческих писаний
стяжав, пребыл еси, богомудре Лазаре, в добром
послушании у епископа Новаграда Василия,
поучаяся сердцем сладостно. И бысть ти
поучения сии “вожделены паче злата и камене
честна многа и сладша паче меда и сота”. И
препроводи с ним девять лет, дондеже Василий
не отыде ко Господу в селения вечныя. Помале
же времени явился святитель в видении ти,
Лазаре, и повеле идти на великое Онего-море, на
Мучь-остров. Ты же весь в послушание
преложився, к оному месту потекл еси. Мы же,
дивящися твердому твоему мужеству, воспеваем
умиленно:

Радуйся, Лазаре, веру пламенну, яко мать
всякаго добраго дела, имевый;

Радуйся, драгоценное украшение
иноков, послушание велие явивый.

Радуйся, веление епископа, в видении соннем
данное, верно исполнивый;

Радуйся, Мучь-остров у Новоградского
посадника откупивый.

Радуйся, zde в отшельничестве и лишениях
богоугодно поживый;

Радуйся, преемника своего Афанасия на
духовную жизнь вдохновивый.

Радуйся, отче богомудре, житием своим вся ны наставляяй;

Радуйся, святе, иго Христово зело возлюбивый.

Радуйся, преподобне Лазаре, терпения наставниче и теплый о нас молитвенниче.

Кондак 3

Силою Вышняго укрепляем, путь жизни своея, жесток и труден, а по надеждам благим вожделенен и сладостен, достойне прешел еси, богомудре Лазаре. Многи скорби претерпел, имиже многи добродетели: слезы, смирение, ревность ко Господу обрел еси, Емуже воспеваеши выну: Аллилуия

Икос 3

Имея крепкую веру, и возжелав спасения вечнаго, пустынный остров возлюбил, блаженне Лазаре. Крест святой водрузил на нем и часовню поставил с малой хижиной вблизи язычников, лопарей и чуди поселился, биения и раны терпя от них и великия скорби, взывал ко Господу псалмом Давидовым: "Пролию пред ним моление мое, печаль мою пред Ним возвещу" и ратовал еси о спасении сих душ во тьме и сени смертней погибающих. Сего ради приносим ти похвалы сия:

Радуйся, Лазаре, от язычник-лопарей много претерпевый;

Радуйся, слезы очей об их языческом заблуждении во множестве изливавай.

Радуйся, банею слез своих очи чистого сердца созидавай;

Радуйся, чрез слезы кротость, мир, сердоболие и смиренномудрие снискавай.

Радуйся, душею за чудь и лопарей болевый и страдавай;

Радуйся, Лазаре, любви ко всякому Божию творению ученики твоя научивый.

Радуйся, отче и нас к Божией любви приводящий.

Радуйся, Угодниче Божий, Создателя и творение Его возлюбивый, и в Нем Единем упокоение снискавай.

Радуйся, преподобне Лазаре, терпения наставниче и теплый о нас молитвенниче.

Кондак 4

Бурею помышлений о спасении душ лопарей-язычников движимый, по заповеди Господней еже “любити врагов” поступаая, дабы свободити душу от огорчения, гнева, ненависти, памятозлобия и сподобитися величайшего стяжания совершенной любви, со умилением взывал Христу Спасителю: Аллилуиа.

Икос 4

Слыша и зная и веруя, яко “Бог любви есть ... и любви не мыслит зла”, ты, благословенне Лазаре, моление творил выну об обидчиках своих. И се прииде к тебе старейшина лопарей, нося на руку отроча слепа от рождения и глагола: ”да сотвориши его здрава и мы отыдем от острова сего”. И взем отроча, ты моление горячее вознес о нем Господеви и Пречистой Богоматери и окропив святою водою, приложих ко Владычню образу и прозре младенец. Ты же о таком чудеси прославил еси Бога. Видевшии же сие чудо крестися и по мале времени Божиим промыслом лопари удалишася от места сего. Мы же, дивящеся о сем, приносим ти благодарственную песнь:

Радуйся, Лазаре, слепому младенцу лопарей зрение возвративый;

Радуйся, и сердца самих язычников своею кротостию и любовью покоривый.

Радуйся, силою благодати Божией лопарей просветивый;

Радуйся, в православие их любовь обративый.

Радуйся, по чудеси твоему многи люди к тебе стекахуся и нецыи из них в иночество постригахуся;

Радуйся, отче, стадо духовное Христово преемнику своему вручил еси.

Радуйся, Единым Богом жив сый, Ему выну хвалу и славу возносил еси;

Радуйся, огражден Высшею помощию zde, тамо сыноположение обрел еси.

Радуйся, преподобне Лазаре, терпения наставниче и теплый о нас молитвенниче.

Кондак 5

Богозданная пустынь, путь, ведущий в Небо, прия тебе, всехвальне отче наш, и чрез труды велии содела тя праведна, свята, блага, и столь чиста, яко еще при жизни на земли удостоен был еси зрети Пресвятую Богородицу. О сем ликовствуя, во умилении, вопием Богу:

Аллилуиа.

Икос 5

Видяще твое иноческое преуспяние и чистоту сердца твоего предано Единому Богу, Преплагая Владычица явися ти, достохвальне Лазаре.

Видех бо свет велий сияющ и се хождуху мужи благообразнии, посреди же Жену светолепну златом сияющу. Ты же от видения того радости исполнился и со слезами моляся пал еси пред образом Преплагословенныя, иже, осиянный светом, обретеса у древа высоко от земли. Глас изыде от иконы: "Призрю на смиренныя рабы, и

место сие”. Мы же, видяще велию милость
Пречистыя к тебе, отче блаженне, поем ти:
Радуйся, Лазаре, явление Царицы Небесныя во
страхе и умилении зревый;
Радуйся, чудесному стоянию иконы и гласу Ея
сладчайшему внимавай.
Радуйся, повеление Божия Матери об устройении
церкви zde радостно восприемый;
Радуйся, возврат платы за Мучь-остров от сына
посадника получивый.
Радуйся, храм во имя Успения Богородицы и
келии братии соорудивый;
Радуйся, благословенную обитель достойному
преемнику вручивый.
Радуйся, богомудрый игумене, добле корабль
церкви направляющий;
Радуйся, славне, ныне в духовном Раи, Небесней
Церкви, предстоящий.
Радуйся, преподобне Лазаре, терпения
наставниче и теплый о нас молитвенниче.

Кондак 6

Проповедниче православныя веры и истиннаго
жития во Христе Иисусе явился, преславный
отче Лазаре, церковь на земли создаючи. В ней
бо древо Жизни святой Жертвенник
примирения, жизнь верным источает. Церковь
бо суть духовная лечебница, радость

радующихся, утешение унывающих. Тем же многих обратил еси ко Христу Жизнодавцу, поя благодарственно Ему: Аллилуиа.

Икос 6

Возсиял яко “свеща на свещнице”, созидаю тело Христово, строго соблюдая, дабы “едино тело, един дух” чрез Таинства Церкви в храмах были вси. Храм бо возведение дольнего в горняя, земная в небесная. Сему ревнуя, всехвальне, не токмо храмы внешния, но паче храмы внутренния, храмы душ Богу уготовлял еси.

Сему радуяся, воспеваем ти, сицевая:

Радуйся, преподобне, храм души твоея Святым Духом осияваемый, имевый;

Радуйся, Богу служба человеков на лучшее пременяющий.

Радуйся, весь подвиг на стяжание Духа Свята направляющий;

Радуйся, долгожителю земный, более века духом пред Господем пламеневший.

Радуйся, бессмертный огонь, Тайны Христовы, достойно приемлющий и Дары сия приносящий;

Радуйся, ключами Таинств Церковных двери Царствия Божия христианам отверзаяй.

Радуйся, богопросвещенный ум и сердце в горняя устремляяй;

Радуйся, образ Божий и подобие Его в себе стяжавый.

Радуйся, преподобне Лазаре, терпения наставниче и теплый о нас молитвенниче.

Кондак 7

Хотя последовати Христу, подражал Ему всеусердно, великаго ангельскаго образа чин восприял, чистою душею огнь пламенной молитвы за весь мир возносил и великую схиму, яко печать совершенства от Бога приял, с трепетом вопия Ему:Аллилуиа.

Икос 7

Новая заповедь Христа: "Да любите друг друга" полностью во обители твоей, преподобне, исполнися. Тамо бо братия твоя имеша едину душу и едино сердце, един ум и едину волю исполняти заповеди Христа Бога, помоществуя взаимно нести тяготы коегождо и тем привлекая Божию милость. Все иноцы твоя радовахуся и благодаряще Бога за обитель сию, селение небесное, земное небо и нас привлекают к славословию сему:

Радуйся, подвижниче усердный, на земли во обители монашеской живший;

Радуйся, ангелом уподобивыйся и Небесных Сил сопричастниче бывый.

Радуйся, к ним ум свой возносивый;
Радуйся, утешения в души своей от Креста
Христового приявший.
Радуйся, дивнии глаголы благодати Божия в
душе своей слагавший;
Радуйся, желанное упокоение в Кресте
Христовом обретший.
Радуйся, яко лампада негасимая пред Лицем
Господа горевшая;
Радуйся, с апостолом: "Имже мне мир распяся и
аз миру", возглашающий.
Радуйся, преподобне Лазаре, терпения
наставниче и теплый о нас молитвенниче.

Кондак 8

Странно суетному миру слышати, яко
молитвами твоими, достохвальне отче, богатство
милосердия изливается на всех притекающих к
твоему небесному покровительству. Молитва
суть ангельское делание, соединение души с
Богом, сокровище благодати. И мы,
благодарнии, радостно воспеваем: Аллилуиа.

Икос 8

Всецело огнем Божественныя любви исполнен и в
молитву погружен, ты, достоблаженне, выну
следуя апостолу: "помолюся духом, помолюся и
умом, ...восхождения в сердце своем положи" и

обретоша горение духа. Молитва бо и монахов и мирских человек богатство, сила немощных, таинственное священнодействие ума. Ты же и нас привлекаешь к сему, моляся днем и нощью, да воспеваем благодарнии:

Радуйся, сердце свое молитвою очистивый;

Радуйся, дар слез чрез молитву обретый.

Радуйся, непостижимую тишину, мир и покой в душе снискавший;

Радуйся, кадило молитвы неугашаемое и благоухающее.

Радуйся, неизреченный мир, радость и теплоту испытавший;

Радуйся, умиленным сердцем любовь Христову молитвою стяжавый.

Радуйся, молитвою, сим “дыханием духа”, вся печали отгонявший;

радуйся, ныне с Богом пребывающий и о нас молящийся.

Радуйся, преподобне Лазаре, терпения наставниче и теплый о нас молитвенниче.

Кондак 9

Всяку чудодейственну силу благодатию дивнаго во святых Своих Бога стяжав, преподобне, высоким житием по заповедем Господним. Источник бо и основание дара чудодействия благодать и любви Божия,

изливающаяся на тя чрез молитву, непорочность и чистоту сердца твоего, преблаженне. Сего ради Творцу всяческих вопием: Аллилуиа.

Икос 9

Витийство человеческое не довлеет изрещи, коликую мзду восприимут вернии исполнением заповедей Господних. Сам бо Спаситель наш рече: "Аще заповеди Моя соблюдете, пребудете в любви Моей" и апостоли: "яко заповеди Его живот вечный есть и заповеди Его тяжки не суть". Господь видя горение сердца твоего, преподобне Лазаре, в искании Его, открься и яви помощь Свою тебе, творящему заповеди Его. Сего ради прими похвалы сия:

Радуйся, нищетою духа смиренномудрием облеченный;

Радуйся, плач, омывающий и утешающий душу обретый.

Радуйся, кротостию, яже зло добром побеждаяй себе украсивый;

Радуйся, плод правды, совершенство добродетелей в себе возрадивый.

Радуйся, милостью наставлениями о спасении душ горевший;

Радуйся, чисто сердце обителью Божией сотворивый.

Радуйся, мир чрез умаление зла и богатство любви источавый;

Радуйся, поругания, и бияния смиренне сносивший.

Радуйся, преподобне Лазаре, терпения наставниче и теплый о нас молитвенниче.

Кондак 10

Спасти хотя душу свою, плоть презрел, на вся видимая аки на прах и дым взирал, преподобне. Подвиги иноческия, молитвы и труды неустанные совершая Бога ради, духом пламенел, в горняя устремляясь, и в радости духовней Спасителю Христу взывал: Аллилуиа.

Икос 10

Стена и прибежище был иноком, чадом твоим духовным, уневестив их Христу, преподобне отче Лазаре, евангельски пожив, обитель Божию, монастырь, сию крепость Церкви создал и братию богомудро наставляя упасл еси, на пажитях нивы Господней к вечному царствию приводя. О сем радуясь взываем ти:

Радуйся, угодниче Божий, на земли для неба поживый;

Радуйся, розго Христова, добрые плоды Ему приносяй.

Радуйся, любовью к Богу и человеком
пламеневший;

Радуйся, чувство «в гортани моем горечь от
людской боли» имевый.

Радуйся, слезами твоими грехи потопляюще,
мир людский очищавый;

Радуйся, ничесоже не имеющий в мире, обаче
всем премирным обладавый.

Радуйся, тяжесть подвига сладостию упокоения
облегчавый;

Радуйся, выну помня, Кто «мертвит и живит»,
животочныя слова Божия в дела претворявый.

Радуйся, преподобне Лазаре, терпения
наставниче и теплый о нас молитвенниче.

Кондак 11

Пение благоговейное Богу достойно
приносил, преподобне отче наш, с радостию шел
ко Христу в послушание, ведая яко жизнь zde во
плоти дана для благоугождения Господу. И
стремясь достигь совершенства, многи подвиги
совершил, богоблаженне, пост, непрестанну
молитву, бдение, слезы, поклоны, изнурение
тела, яже привлече на тя благодать Божию и
Всещедрый Владыка духовное преспеяние
дарова ти. О сем благодарным сердцем в
веселии пел еси Создателю своему: Аллилуиа.

Икос 11

Светильник добродетелей и совершенства явился, преблаженне отче наш Лазаре. Оставив бо сродники своя, небрегл о здравии своем, никия препятя, напасти, мучения, ниже самая смерть не возможе удержати тя от стремления ко Господу. Ты бо облекся еси «якоже избранный Божий свят и возлюбленный ..., в благость, смиренномудрие, кротость, долготерпение ..., любовь, яже есть союз совершенства и мир Божий». О сем прославляя Бога, воспеваем совершенство добродетелей твоих:

Радуйся, во иночестве естества чин препобедивый;

Радуйся, оставив мир и всяко земное бремя, путь в горняя направивый.

Радуйся, тишину свободы от страстей и отраду душевную стяжавый.

Радуйся, неусыпное око, молитву умную, выну творивый.

Радуйся, состояния вожделенного: «Аз сплю, а сердце мое бдит» достигший;

Радуйся, смиренномудрием, до забвения своих добрых дел украсивыйся.

Радуйся, совершенным чадом небесным соделавыйся;

Радуйся, преподобне, нам путь спасения и доньне указующий.

Радуйся, преподобне Лазаре, терпения наставниче и теплый о нас молитвенниче.

Кондак 12

Благодать Божия дала ти, силы высочайшей любви к Богу, пробуждая в душе чувство непрестанного стремления к Нему. Господь рече: «Аз любящия мя люблю, ищущия же Мене обрящут благодать». И тоя ради любви ты, достославне, претерпел великия скорби, сокрушение духа, многия слезы, препобедив себе самого. О сем умиляся славословие приносим Творцу: Аллилуиа

Икос 12

Поим Богу велию славу за велицьи неизреченная Его благодеяния любовь Его и обетования Его. Тако бо рече Господь: «Аз рех: бози есте и сынове Вышняго вси ..., вся возможна верующему». И на тебе, преподобне, исполнишася сия. Достоблаженное бо житие твое бысть приготовление к горнему миру к прехождению к вечности. В смерти же открывается полнота замысла о человеке, ибо и в горнем и в дольном Един Господь. Сему благоговей, поим со умилением:

Радуйся, добре Бога ради подвизавыйся;
Радуйся, яко образом и подобием Бога ставший.
Радуйся, смирению Христову подражавый;
Радуйся, покаяния глубокаго, иже есть сердце
духовныя жизни, снискавый.
Радуйся, тяжесть неисцелимости болезни на себе
познавый;
Радуйся, душею близость Бога, Его любовь и
благоутробие, восприявый.
Радуйся, сердце свое радостно Ему отдавый;
Радуйся, с верою и любовью за весь мир
моливыйся.
Радуйся, преподобне Лазаре, терпения
наставниче и теплый о нас молитвенниче.

Кондак 13

О преславный угодниче Божий, преподобне
Лазаре, игумене обители Муромския, отче наш
богомудрый и наставниче всеблаженный!
Приими малое сие моление наше, усердно тебе
приносимое и испроси у Спасителя нашего
Господа Иисуса Христа, престолу Его
предстоящу ти, да твоим предстательством
дарует Господь Бог всем нам добродетельное и
богоугодное житие, терпение, имже ты
изобиловал, мир душам нашим, здравие
телесное и духовное преуспеяние. Да тако
спасаемии в вечней жизни с тобою воспеваем

Создателю нашему: Аллилуиа, аллилуиа,
аллилуиа.

Сей Кондак глаголи трижды. А по сем читается
Икос1 и Кондак1



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**